

Kawakina Ana Berita

Iroun Lucy Stevenson Ewell

Ana Maekatiin te Ekaretia
(E boboto i aon te karaki ae koaua)

“**A**i ti onoua te bong imwain au bwabetito!” E taku Happiness. E a moana n roko te bong anne!

“Ko a tauraoi?” e titiraki Tamau.

“I taku” e kaeka Happiness.

“Ngkana ko bwabetitoaki, ko karaoa te berita ae tabu,” e taku Tamau. “Ko uringnga tera nanon anne?”

“Bon te berita, eti anne?”

E katoutoua atuuna Tamau. “Eti! Ko berita bwa ko na iriira Iesu Kristo ao ni kawakin tua. E berita Tamara are i Karawa bwa E na kakabwaiako ao e na buokiko.”

E wingare Happiness. E ataia bwa bon te berita ae kakawaki. E kukurei ngkai E nang karaoia!

N tokina e a roko ana bong ni bwabetito. E oneia Happines nakon kunikai aika a mainaina. Uoman riki ataei aika a na bwabetitoaki naba. A bane ni matakun ngkai e a onrake n ran te tabo ni bwabetito.



Ngke e a roko ana tai, a ruo nako nanon te tabo ni bwabetito Happines ao Tamau. E taekina tataron te bwabetito Tamau. Imwiina e koona bwairina Happiness, ao Tamau e kateboa nako naano iaan te ran.

Ngke e waerake, e namakina te kukurei inanona Happiness! E tangiria ni kawakina ana berita ni iriira Iesu. E tangiria n namakina te itiaki aei ao ni kukurei n aki tuki. E aki tangiria ni manga karaoa te rinerine ae kairua riki.

Tabewa te bong imwiina, e uti Happiness ao ni kamaeua te bwai are e kabueea te ran, bwa e aonga n tebotebo. E anaa te tai ae maan bwa e na kabuebue te ran. Ngaia are e a kamaeua te TV Happiness. E tangiria ni matakun n tamnein te katuun ngkai e tatanninga.

E ngarengare Happines ngkai e matakun n taiani man aika a taetae iaon te tikuriin. E rangi ni kaka-manga te tamnei! Ngaia are e a maninga taekan te bwai are e kabueea te ran.

Teuana te aoa imwiina, e a roko Tamau inanon te ru. “Ai maanra te tai ae e maiu iai te bwai ni kabuebuean te ran?” e titiraki.

E tararake Happiness. E a tia n rangi ni maan ni matakun n te TV nakon are e iangoia!

“E aki rangi ni maan,” e taku Happiness. “Ti inanon tabewa te miniti.” E kamatea te TV ao ni biri n nako n tebotebo.

Ma n nikiran te bong anne, e namakina te aki rau inanona Happiness. Imwiin ana bwabetito e tangiria n aki manga karaoa te rinerine ae kairua. Ma e a tibwa tia ni kewe nakon Tamau!

E kanakoa angina Happiness. E ataia bwa tera ae e riari ni karaoia.

“O, Tamau,” e taku Happiness. “I a tia n taekina te kewe. I katuka ni kamaeua bwain kabuebuean te ran n te tai ae maan, ma bon tiaki nanou. Kabwara au bure.”

*I a tia ni kewe
nako Tamau.
Tera mwiina?*



“E Raoiroi. Ko rabwa ngkai ko kaongoai,” e taku Tamau.

“I namakina ae I kairua ibukina bwa I urua au berita n te bwabetito,” e taku Happiness.

E tekateka Tamau ma Happiness iaon te kaintekateka ae maraurau. “Ngke ko bwabetitoaki, ko aki berita bwa ko na kororaai. Ko berita bwa ko na keiaki korakora ni iriira Iesu.”

E katoutoua atuuna Happines. Anne e angan-riki te namakin ae tamaroa.

“Ao ko ataia bwa tera ae ko kona ni karaoia ngkana ko karaoa te rinerine ae kairua?” E titiraki Tamau.

“Raira nanom?” e kaeka Happiness.

“Eti anne! Ngkana ti raira nanora, Tamara are i Karawa e na kabwarai ara bure. Ngkanne ti kona ni manga itiaki n aron are n te bong are ti bwabetitoaki iai. Te rairannano bon *mwakoron* kawakin am berita n am bwabetito.”

E wingare Happiness. “N nang tataro ao ni butiia Tamara are i Karawa bwa E na kabwarai au bure.” E kukurei bwa e kona ni kawakin ana berita n te bwabetito. ●

E riki te karaki aei i Ghana.

